



宋姜白石詩詞合集

戊辰三月中浣二日得



白石詩詞

1123

四  
宋姜白石集

# 宋姜白石集

蘇東坡

華莘書屋

白石自定詩僅一卷世罕傳布詞五卷所存止草窗花庵撰錄十數首而已比搜得藏本顧詩中如奉天台祿閒詠小孫納婦悉係同時姜特立所作詞雖倍於舊數然點絳唇咏草一首復見諸林處士集中盖嬪世既寡譌脫相承所不免矣夫白石在渡江諸賢中品目顯著然且若此則夫單家孤帙其為名湮響絕者知復何限于幼耽倚聲於南宋諸家最愛白石今始獲覩其合集因不敢自秘亟鐫諸木以廣其傳庶幾如昔人所云欲飲則人適河索照而家家取燧詎不稱愉快也耶雍正

丁未四月歙陔華洪正治書

白石道人自敘

詩本無體三百篇皆天籟自鳴下逮黃初迄於今  
人異韞故所出亦異或者弗省遂豔其各有體也  
近過梁谿見尤延之先生問余詩自誰氏余對以  
異時泛閱衆作已而病其駁如也三薰三沐師黃  
太史氏居數年一語噤不敢吐始大悟學即病顧  
不若無所學之爲得雖黃詩亦偃然高閣矣先生  
因爲余言近世人士喜宗江西溫潤有如范至能  
者乎痛快有如楊廷秀者乎高古如蕭東夫俊逸  
如陸務觀是皆自出機軸豈有可觀者又奚以江

西爲余曰誠齋之說政爾昔聞其歷數作者亦無出諸公右特不肯自屈一指耳雖然諸公之作殆方圓曲直之不相似則其所許可亦可知矣余識千巖於瀟湘之上東來識誠齋石湖嘗試論茲事而諸公咸謂其與我合也豈見其合者而遺其不合者耶抑不合乃可以爲合耶抑亦欲俎豆余於作者之間而姑謂其合耶不然何其合者衆也余又自喟曰余之詩余之詩耳窮居而野處用是陶寫寂寞則可必欲其步武作者以釣能詩聲不惟不可亦不敢

自敘二

作者求與古人合不若求與古人異求與古人異不若求與古人合而不能不合不求與古人異而不能不異彼惟有見乎詩也故向也求與古人合今也求與古人異及其無見乎詩已故不求與古人合而不能不合不求與古人異而不能不異其來如風其止如雨如印印泥如水在器其蘇子所謂不能不爲者乎余之詩蓋未能進乎此也未進乎此則不當自附於作者之列悉取舊作秉畀炎火俟其庶幾於不能不爲而後錄之或曰不可物

以蛻而化不以蛻而累以其有蛻是以有化君於  
詩將化矣其可以舊作自為累乎姑存之以俟他  
日

附諸家評論

宋陳藏一郁曰白石道人姜堯章氣貌若不勝衣  
而筆力足以扛百斛之鼎家無立錫而一飯未嘗  
無食客圖史翰墨之藏汗牛充棟襟期灑落如晉  
宋間人意到語工不期於高遠而自高遠

宋弁陽老人周公謹密曰番陽布衣姜夔堯章出  
處備見張輯宗瑞所著白石小傳矣近得其一書  
自述頗詳可與前傳相表裏云某早孤不振幸不  
墜先人之緒業少日奔走凡世之所謂名公鉅儒  
皆嘗受其知矣內翰梁公於某為鄉曲愛其詩似

唐人謂長短句妙天下樞使鄭公愛其文使坐上  
爲之因擊節稱賞參政范公以爲翰墨人品皆似  
晉宋之雅士待制楊公以爲子文無所不工甚似  
陸天隨於是爲忘年友復州蕭公世所謂千巖先  
生者也以爲四十年作詩始得此友待制朱公旣  
愛其淡於禮樂丞相京公不獨稱其禮樂之書又  
愛其駢儷之文丞相謝公愛其樂書使次子來謁  
焉稼軒辛公淡服其長短句如二卿孫公從之胡  
氏應期江陵楊公南州張公金陵吳公及吳德夫  
項平甫徐子淵曾幼度商翬仲王晦叔易彥章之

徒皆當世俊士不可悉數或愛其人或愛其詩或  
愛其文或愛其字或折節交之若東州之士則樓  
公大防葉公正則則尤所賞激嗟乎四海之內知  
已者不爲少矣而未有能振之於窶困無聊之地  
者舊所依倚惟有張兄平甫其人甚賢十年相處  
情甚骨肉而某亦竭誠盡力憂樂關念平甫念某  
困躓場屋至欲輸資以拜爵某辭謝不願又欲割  
錫山之膏腴以養其山林無用之身惜乎平甫下  
世今惘惘然若有所失人生百年有幾賓主如某  
與平甫復有幾撫事感慨不能爲懷平甫旣歿稚

子甚幼入其門則必爲之悽然終日獨坐逡巡而歸思欲捨去則念平甫垂絕之言何忍言去留而不去則既無主人矣其能久乎云云同時黃白石之言曰造物者不欲以富貴浼堯章使之聲名焜耀於無窮也此意甚厚又楊伯子長孺之言曰先君在朝列時薄海英才雲次鱗集亦不少矣而布衣中得一人焉曰姜堯章嗚呼堯章亦布衣耳乃得盛名於天壤間若此則軒冕鐘鼎真可敝屣矣是時又有單煒炳文者沅陵人博學能文得二王筆法字畫遒勁合古法度于攷法書尤精武舉得

官仕至路分著聲江湖間名士大夫多與之遊自號定齋居士與堯章投分最稔亦韻士也堯章詩詞已板行獨雜文未之見余嘗於親舊間得其手藁數篇尚思所以廣其傳焉

宋樂雷發題許介之譽文堂詩有曰姜夔劉過竟何爲空向江湖老布衣又題史主簿授菴集藁後云姜夔荒塚白蘋深鷺鷥無聲結綠沈

本朝朱秀水竹垞曰謫仙云詩傳謝眺清惟清之至乃能麗密唐之孟襄陽宋之姜白石明之徐迪功盡洗鉛華極蕭散自得之趣故獨步一時

又曰鄱陽姜堯章撰絳帖評二十卷子搜訪四十年始鈔得僅存六卷爾堯章於書法最稱精鑒其言曰小學既廢流爲法書法書又廢惟存法帖帖雖小技上下千載關涉史傳爲多故於是編條疏而考證之一一別其僞真察及苗髮其餘若續書譜禊帖偏旁攷保母甄皆能伐其皮毛啜其精髓比諸黃長睿王順伯爲優

王新城阮亭曰白石集予鈔之近百首蓋能叅活句者白石詞家大宗其於詩亦能深造自得自序同時詩人以溫潤推范石湖痛快推楊誠齋高古

推蕭千岩俊逸推陸放翁白石遊於諸公間故其言如此其詩初學黃太史正以不深染江西派爲佳

Blank columns for text on the right page.

白石詩集

宋番陽姜夔堯章著

五言古詩

奉別沔鄂親友

以長歌意無極好為老夫聽為韻

滔滔沔鄂留有忝三宿桑持益了白日事賤丸  
蜨舍當去石友烟席凌江湘為君試歌商歌短意  
則長

佳人魯山下

謂楊大昌正之

日弄清漢波促絃調寶瑟哀

思感人多咬哇秦缶擊冷落郢客歌知音良不易  
如此粲者何

白石詩集  
英英白龍孫

鄭仁舉次臯

睂目古人氣拮据營數椽下

簾草生砌文章作逕庭功用見造次無庸垂罄嗟  
遺安鹿門意

詩人辛國士

辛泌克清

句法似阿駒別墅滄浪曲綠陰

禽鳥呼頗參金粟眼漸造文字無兒輩例學語屋

壁祝

一本蒲盧作呼

山陰千載人揮灑照八極只今定武刻猶帶龍虎

筆單侯出機杼

單名炳文

豈是劒舞得餘波入竹石絕

歎咄咄逼

異時之呆君在涅守白顥黃鐘欠牛鐸淋漓弔遺

稿有子殊可人

蔡迨堅吾子字武伯

特未見此老客來請論

文但道曲肱好

中郎遊千霜曲高復誰為龐翁趣無絃鄭伯功斷

鼻春風桃花溪寒渌繞蒼翠何當從兩君放浪計

幽事

宦達羞故妻貧賤厭丘嫂上書雲雨迴還舍筍蕨

老江臯鋤帶經決計恨不早士無五羖皮沒世抱

枯槁

伐木响虛牝吾願友褐夫九關呀虎豹何時內高

祛黃鵠渺雲樹鸚鵡澹烟蕪倚杖得清賞洗心觀

本初

孤鴻度關山風霜催翊翎影低白雲暮哀嗷那忍  
聽士生有如此儲粟不滿瓶著書窮愁濱可續離  
騷經

赤松圖

山東隆準公未語心已解按劔堂下人成事汝應  
退非無帶礪約政爾有恩害平生三寸舌松間漱  
寒瀨

雪中訪石湖

雪研如玉城偏師敢輕犯黃蘆陣野鷺我自將十

萬三載渠未降北面石湖范先生伯越手定目一  
笑祭

虞美人草

夜闌浩歌起玉帳生悲風江東可千里棄妾蓬蒿  
中化石那解語作草猶可舞陌上望騅來翻愁不  
相顧

華藏寺雲海亭望具區

寺為張循王功德院

茫茫復茫茫中有山蒼蒼大哉夫差國坐占天一  
方夫差醉蓮宮巨浪搖不醒越師何從來奪我玉  
萬頃年年亭上秋一笛千古愁誰能知許一本作幾事

飛下雙白鷗

夏日寄朴翁朴翁時在靈隱

朴即山陰葛天民無懷

風吹松樹枝懷我松間友雲從北山來令我屢回首山雲夜夜起山雨侵人衣遙知竹窗裏自吟新雨詩

春日書懷

九真何蒼蒼乃在清漢尾衡茆依草禾念遠獨伯姊春來衆芳滋春去衆芳萎兄弟各天涯啼鳩見料理漢江出巨魚風雷入驅使安得挾我輶西征二千里

春雲驛路暗遊子眇歸程永懷故山下風雨悲松庭翁仲不解語幽鳥時時鳴人家插垂柳客裏又清明

垂楊大別寺春草郎官湖家巷有石友合并不待呼瘦藤倚花樹花片藉玉壺老鄭談絕妙辛楊句敷腴平生子姚子貌古心甚儒時邀野僧語間與琴工俱酒闌興未了左轉城南隅大江圍楚碧烟水入元虛留落不自恨惟嗟故人疎一月三見夢夢中相與娛日日潮風起悵望武昌魚武昌十萬家落日紫烟低亭亭頭陀塔高處白鳥棲白鳥忽

飛去春山空四圍南樓有佳人再召且再辭閉門  
課文史搜物深天機斯人不可致白鳥會來歸

篴篴引

篴篴且勿彈老大不可聽河邊風浪起亦作篴篴  
聲古人抱恨死今人抱恨生南鄰賣妻者秋夜難  
爲情長安買歌舞半是良家婦主人雖愛憐賤妾  
那久住緣貧來賣身不緣觸夫怒日日登高樓悵  
望宮南樹

賦千岩曲水

紅雨灑溪流下瀨仍小駐魚隊獵殘香故故作吞

吐老子把一盞微風忽吹去

李陵臺

李陵歸不得高築望鄉臺長安一萬里鴻鴈隔年  
回望望雖不見時時一上來

待千岩

褰裳望洞庭眼過天一角初別未甚愁別久今始  
覺作箋非無筆寒鴈不肯落蘆花待拏舟怪底北  
風惡

若人金石心試問洞庭浪傳聞下巴陵瀝酒喜無  
恙我行丹楓林屢騁白蘋望烏鵲不可嗔論功當

坐上

呈徐通仲兼簡仲錫通仲與誠齋為鄉人  
近來赴調而誠齋去國又通仲久與千岩  
有茗雪之約而未至余挽通仲欲與同歸  
千岩故末章及之

斯文準乾坤作者難屈指我從李郭遊知有徐孺

子春風橘洲前白月太湖尾懷哉一作我來無期玉

唾炯在紙去年識仲氏何啻空谷喜合并忽自天

顛倒見底裏維君天下士竹箭東南美胡不在石

渠諸公當料理千岩今林宗泉石助風軌示病一作

疾不下堂有句高八米此老筆硯交誠齋古元禮  
毫端洒秋露去國詞愈偉屬聞都門別回首即桑  
梓獨憐苔溪上垂榻俟行李烟波肯尋盟歸櫂為  
君艤

和轉菴丹桂韻

野人復何知自謂山澤好來禪奉常議識笳鼓羽  
葆誰憐老垂垂却入鬧浩浩營巢猶是寓學圃何  
不早淮桂手所植漢甕躬自抱花開不忍出花落  
不忍掃佳客夜深來清尊月中倒一禪兩居士更  
約踐幽討

昔遊詩

夔蚤歲孤貧再走川陸數年以來始獲寧處  
秋日無謂追述舊遊可喜可愕者吟為五字  
古句時欲展閱自省生平不足以爲詩也

洞庭八百里玉盤盛水銀長虹忽照影火哉五色  
輪我舟度其中晃晃驚我神朝發黃陵祠暮至赤  
沙曲借問此何處滄灣三十六青蘆望不盡明月  
耿如燭灣灣無人家只就蘆邊宿

放舟龍陽縣洞庭包五湖

澧沅澆  
湘大江

洶洶不得道茫

茫將奈何篙師請小泊石矸沉泥沙是中無岸

強指葦與莎滯留三四晨大浪山嵯峨同舟總下  
淚自謂餵黿鼉白水日以長僅存青草芽轉盼又  
巴陵但見千頃波此時羨白鳥飛入青山阿

九山如馬首一一奔洞庭小舟過其下幸哉波浪  
平大風忽怒起我舟如葉輕或升千丈波或落千  
丈坑回望九馬山政與大浪爭如飛鵝車礮亂打  
睢陽城又如白獅子山下跳猙獰須臾入別浦萬  
死得一生始知茵席溼盡覆杯中羹

蕭蕭湘陰縣寂寂黃陵祠喬木蔭樓殿畫壁半傾  
敲蘆洲雨中淡漁網煙外歸重華不可見但見江

鷗飛假令無恨事過此亦依依

我乘五板船將入沌河口大江風浪起夜黑不見  
手同行子周子渠膽大如斗長竿插蘆席船作野  
馬走不知何所詣生死付之偶忽聞入草聲燈火  
亦稍有找船遂登岼亟買野家酒

天寒白馬渡

漢川縣界

落日山陽村是時無霜雪萬里

風奔奔外旃吹已透內纊冰不溫吹馬馬欲倒吹  
笠任飛翻不見行路人但見草木蕃忽看野燒起  
大燄燒乾坤聲如震雷電勢若江湖吞虎豹走散  
亂麋鹿不足言夜投野店宿無壁亦無門此行值

三厄幸得軀命存明發見老姊斗酒為招魂

揚舡下大江日日風雨雪留滯鼇背洲十日不得  
發岸冰一尺厚刀劍觸舟楫岸雪一丈深屹如玉  
成堞同舟二三士頗壯不恐懾蒙羶間篷臥波裏  
任傾側晨興視羶上積雪何皎潔欲上不得梯欲  
留岸頻裂板援始得上幸有人見接荒村兩三家  
寒苦衣食缺買豬祭波神入市路已絕如今得安  
坐閑對妻兒說

青草長沙境洞庭渺相連洞庭西北角雲邊更無  
邊後有白河沌渺漭里數千豈惟大盜窟神龍所

盤旋白湖辛巳歲忽墮死蜿蜒一鱗大如箕一鬣  
大如椽白身青鬚鬣兩角上梢天半體臥沙上半  
體由沈淵里正聞之官官使吏致虔作齋為禳祓  
觀者足闐闐斂席覆其體數里聞腥羶一夕雷雨  
過此物忽已遷遺跡陷成川中可行大船是年虜  
亮至送死江之孺或云祖龍讖詭異非偶然近日  
山陽人采菱不知還望見三龍浮目若電火燃見  
龍多見尾少見四體全一龍已為異三者亦罕傳  
又因漁湖側水中忽生煙煙中一驢出繞身步蹠  
蹠俄隨霹靂去欲語無由緣我聞語此事乘舟往

觀焉徑往招葭浦白鷺爭相先湖有劉備廟寔司  
浩渺權徘徊無所見歸櫂月明前

昔遊洞源山先次白馬渡

桃源縣界

渡頭何清深鴻鵠

在高樹白馬亦洞天昔人有奇遇洞門不可見但  
聞水聲怒瞻彼羽人宅乃乘方船渡修廊夾五殿  
重閣映千樹規模象魏壯四合綠陰護山椒望五  
溪壺頭入指顧故宮在其北屋瓦帶松霧古杉晉  
時物中空野人住外圍四十尺內可十客聚我遊  
瞿仙館壇上表遺步却下八疊坡一亭衆妙具兩  
山抱澄潭老木枝幹互瞻前秀而迴坐久凜難駐

桃源獨不見僻在宮南路山行轉深邃狙猿吟上  
下石竇出微涓令我意猶豫昔聞漁舟子水際見  
洞戶今看去溪遠定是後人誤惆悵却歸來此遊  
不得屢於今二十年歷歷經行處

昔遊衡山下看水入朱陵半空掃積雪萬萬玉花  
凝或如生綃挂或作薄霧橫紛紛虎豹吼往往蛟  
龍驚人語不相聞濺電漂風纓有魚緣峭壁上上  
終不停此中有神物雷雨周八紘

昔遊衡山上未曉入幽谷欲識所坐輿橫板挂兩  
竹狀如秋千垂高下不傾覆登山九千丈中道多

佛屋一峯高一峯一峯秀林木仰看同來客木末  
見冠服高臺石橋路尋常雲所宿下方雷雨時此  
上自晴旭紫蓋何突兀萬里在一目餘峰六七十  
僅如翠浪矗北有嬾瓚巖大石庇樵牧下窺半厓  
花杯盃琢紅玉飛雲身畔遇攬之不盈掬祝融最  
高絕紫蓋不足錄俯視同仰觀蒼蒼萬形伏惟餘  
岫嶁峰南睇半空綠髣髴認瀟湘向岳流屈曲高  
處驚我魂翻思宅平陸其東有雷穴靈異謹勿觸  
雲來綿世界雲去一峰獨僧牕或留罇雲入不可  
逐絕頂橫石渠仙人有遺躅山多金光草夜半如

列燭靈藥不可尋吁嗟歸太速  
濠梁四無山坡陲亘長野吾披紫茸羶縱飲面無  
赭自矜意氣豪敢騎雪中馬行行逆風去初亦略  
霑灑疾風吹大片忽若亂飄瓦側身當其衝絲鞵  
袖中把重圍萬箭急馳突更叱咤酒力不支吾數  
里進一竿燎茅烘濕衣客有見留者徘徊望神州  
沈歎英雄寡

既離湖口縣未至落星灣舟中兩三程程見廬  
山廬山遮半天五老雲爲冠朝看金疊疊暮看紫  
巉巉瀑布在山半髣髴認一斑廬山忽不見雲雨

滿人間

雪霽下揚子閒望江上山上山如白玉日照金孱  
顏是時江水淨影落清鏡寒潮催庾信老雲送佛  
狸還萬古感心事惆悵垂楊灣

衡山爲真宮道士飲我酒共坐有何人山中白衣  
叟問叟家何在近住山洞口殷勤起見邀徐步入  
林藪雲深險徑黑石亂湍水吼尋源行漸遠茅屋  
前如帚耨烹茶味苦野啄琴形醜叟云司馬僊學  
道此居久屋東大磐石碁畫今尚有古木庇覆之  
清泉石根走因悲百年內汲汲成白首仙人固難

值隱者亦可偶追惟恍如夢欲畫無好手

附潘耒德久書昔遊詩後  
我行半天下未能到瀟湘君詩如畫圖歷歷記  
所嘗起我遠遊興其如髣毛霜何以舒此懷轉  
軫彈清商

又附韓流仲止

平生未踏洞庭野亦不曾登南嶽峰因君談舊  
遊恍如常相從江淮歷歷轉湘浦裘馬意氣傳  
邊烽吾嘗汎大江只見匡廬松乘風醉臥帆影  
底高浪直濺嵐光濃日暮泊船時是夜方嚴冬  
雪花壓船船背重纜搖搖鼓聲如鐘當年意淺  
語不到無句可寫波濤春君詩乃如許景物不  
易供盡歸一毫端狀口口飛龍人間勝處貴著  
眼雖有此興無由逢錢唐山水亦自好奈何薄  
宦難從容南高北高一千丈潮頭日夜鳴靈蹤  
應有隱者為識賞青鞵布韞扶杖筇君無詫彼  
我愧此急還詩卷心徒忪

七言古詩

送王孟玉歸山陰

淮南雪落雲繞戍王郎鳴鞭獵狐兔問君本是山  
陰人何不扁舟剡溪去人生樂事將無同知君此  
心如太空只今去踏龍尾道也似寒江蓑笠翁鑑  
湖一曲荷花浦君不歸來花有語舊宅應添竹幾  
竿到家不覺秋如許十年雪裏看淮南聚米能作  
淮南山籌邊妙處須急吐政自不容修竹閒人道  
長江無六月日光正射青蘆葉何以贈君濯炎熱  
雪即是詩詩是雪

烏夜啼

老烏棲棲飛且號晨來枝上啄楮桃楮桃已空楮  
葉死猶啄枯枝覓蟲蟻老烏賦分何其貧未啼已  
被鄰公嗔吁嗟老烏不自知牆頭屋上紛成羣吳  
中貴遊重鸚鵡千金遠致能言語花底紅條鄭袖  
擎盤中碧果秦宮取天生靈物得人憐過者須來  
鸚鵡邊老烏事事無足錄人間猶傳夜啼曲

余居苕溪上與白石洞天為鄰潘德久字  
予曰白石道人且以詩見畀其詞曰人間  
官爵似樗蒲來到枯松亦大夫白石道人  
新拜號斷無繳駁任稱呼予以長句報賦

南山仙人何所食夜夜山中煮白石世人喚作白  
石仙一生費齒不費錢仙人食罷腹便便七十二  
峰生肺肝真祖只在南山南我欲從之不憚遠無  
方煮石何由軟佳名錫我何敢辭但愁自此長苦  
飢囊中只有轉菴詩便當掬水三嚙之

轉菴德久號

丁巳七月望湖上書事

白天碎碎如拆綿黑天昧昧如陳玄白黑破處青  
天出海月飛來光尚濕是月太史奏月蝕三家各  
自矜算術或云七分或食既或云食晝不在夕上  
令御史登吳山下視海門監月出年來曆失無人

修三家之說誰爲優乍如破鏡光炯炯漸若小兒  
初食餅時方下令嚴禁銅破鏡何爲來海東天邊  
有餅不可食聞說飢民滿淮北是鏡是餅且勿論  
須臾還我黃金盆金盆當空四山靜平波倒浸雲  
天影下連八表共此光上接銀河通一冷御史歸  
家太史眠人間不聞鐘鼓傳白石道人呼釣船一  
瓢欲酌湖中天荷葉擺頭君睡去西風急送敲窗  
句

送陳敬甫

十年所聞溢吾耳去年誦君書一紙古人三語得

竒士况此磊落數百字相逢千巖萬壑裏有客如  
君請兄事才高自古人所忌論高不信反驚世好  
詩取客如券契我無三者獨至是如君之貧不可  
避如君之貧不可避呼舟徑度寒潮去一作外

生雲軒

在山長與雲同齋出山憶雲雲不來千金買得太  
湖石數峰相對寒崔嵬朝來忽覺青苔濕黶黶如  
炊石間出白雲何處不相逢却怪年年枉相憶王  
郎胸中橫一邱在山出山雲與遊更呼白石老居  
士來倚雲根吟七字

送項平甫倅池陽

項君聲名天宇窄與君俱是荆湖客向來相聞不相值長安城中乃相識論文要得文中天邯鄲學步終不然如君筆墨與性合妙處特過蘇李前我如切切秋蟲語自謂平生用心苦神凝或與元氣接屢舉似君君亦許西湖一曲古牆陰清坐論詩夜向深見謂人間有公等不知來者不如今乾坤雖大知者少君不見古人拙處今人巧我徂山林口挂壁如君合救狂瀾倒石渠春水綠泱泱閣下無人白日長萬里江湖入歸夢子雲不願校書郎

九華山色梅根渡半日風帆即秋浦六條察吏安用許幸有千巖作詩侶

書乞米帖後

銀鈎鐵畫太師字從人乞米亦可憐五倉空虛胃神哭竟日悄悄無炊烟仙人留書說服氣道士辟穀期引年人生不食浪自苦獨不見子桑鼓琴十日雨

契丹歌

都下聞蕭總管自說其風土如此

契丹家住雲沙中耆車如水馬若龍春來草色一萬里芍藥牡丹相間紅大胡牽車小胡舞彈胡琵琶

琴調胡女一春浪蕩不歸家自有穹廬障風雨平  
沙軟草天鶩肥胡兒千騎曉打圍阜旗低昂圍漸  
急驚作羊角凌空飛海東健鶻健如許韝上風生  
看一舉萬里追奔未可知劃見紛紛落毛羽平章  
俊味天下無年年海上驅群胡一鶩先得金百兩  
天使走送賢王廬天鶩之飛鐵為翼射生小兒空  
看得腹中驚怪有新薑元是江南經宿食

禽言如曰哥哥

君不見苔溪西南石鼓山鳥如鸚鵡啼其間一人  
相傳是阿弟千呼萬喚去復還身為獨雁失儔侶

所愧鵲鴿圖急難繞林哀哀訴明月夜闌月落聲  
漸咽天地闊遠兄不聞蒼厓下淚山竹裂豈無鴉  
舅與鶻姑人各有心非友于陟岡四顧空欷歔君  
不見江南望夫誰家子登山化石不得語

次韻誠齋送僕往見石湖長句

客來讀賦作雌蜺平生未聞衡說詩省中詩人官  
事了狎鷗入夢心無機韻高落落懸清月鏗鏘妙  
語春冰裂一自長安識子雲三嘆郢中無白雪范  
公蕭爽思出塵有客如此渠不貧堂堂五字作城  
守平章勁敵君在口一作京二公句法妙萬夫西來囊

白石詩集  
中藏魯瑱只今擊節烏棲曲不愧當年賀鑑湖  
五言律詩

悼石湖三首

身退詩仍健官高病已侵江山平日眼花烏暮年  
心九轉終無助三高竟欲尋尚留巾墊角□□有  
知音

未作龍蛇夢驚聞露電身百年無此老千首屬何  
人安得公長健那知事轉新酸風憂國淚高塚臥  
麒麟

未定情鍾痛何堪更悼亡遺書知伏枕來弔只空

堂雪裏評詩句梅邊按樂章沈思酒杯落天濶意

一作  
正茫茫

題華亭錢參園池

花裏藏仙宅簾邊駐客舟浦涵滄海潤雲接洞庭  
秋草木山山秀闌干處處幽機雲韜世業暇日此  
夷猶

同朴翁登卧龍山

龍尾回平野簷牙出翠微望山憐綠遠坐樹覺春  
歸草合平吳路鷗忘伯越機午涼松影亂白羽對  
禪衣

坐上和約齋

句入冰輪冷愁因玉宇開可無如此客猶恨不能  
杯好句長城立寒鴉結陣來篁篔莫停手拚却斷  
腸回

出北關

吳兒臨水宅四面見行舟蒲葉侵鷺項楊枝蘸馬  
頭年年人去國夜夜月窺樓傳語城中客功名半  
是愁

答沈器之

江漢乘流客乾坤不繫舟玉琴虛素月金劍落清

秋野鹿知隨草飢鷹故上鞦風流大隄曲一唱使  
人愁

涉遠身良苦登高望欲迷試吟青玉案不是白銅  
鞮露下秋蟲怨風高北馬嘶槎頭有新味人在太  
湖西

菖蒲

岳麓溪毛秀湘渙玉水香靈苗憐勁直達節著芬  
芳豈謂盤盂小而忘臭味長拳山并勺水所至未  
能量

范大參入覲頗愛鄙作以詩謝之

問向石湖老如將日指標枯中說滋味高處戒虛  
驕頗喜唐音近寧論漢道遙政聲今在耳萬樂聽  
簫韶

小孫納婦

慶事集朋親孫枝喜氣新  
鼓雲停碧落舞雪眩青  
春暖日花君子清樽酒聖人  
一春行樂地不負牡  
丹辰

和王祕書遊水樂洞

自是瀛洲客還因野趣來  
解衣吟寂寞攜酒上崔  
嵬石洞山山秀梔花曙曙開  
只應巖下水相送上

舡回

七言律詩

送朝天續集歸誠齋時在金陵

翰墨場中老斲輪真能一筆掃千軍  
年年花月無閒日處處山川怕見君  
箭在的中非爾力風行水上自成文  
先生只可三千首回首江東日暮雲

張平甫哀挽

將軍家世出臞臠合上青雲作計疎  
吳下宅成花未種湖邊地吉草新鉏空  
嗟過隙催人世賴有提孩讀父書他日  
石羊芳草路弟兄來此一沾裾

寄上張參政

姑蘇臺下梅花樹應為調羹故早開燕寢休誇香  
霧重鴛行却望衮衣來前時甲第仍垂柳今度沙  
隄已種槐應念無枝夜飛鵲月寒風勁羽毛摧

京口留別張思順

伯勞飛燕若為忙還憶東齋夜共牀別後無書非  
棄我春前會面却他鄉連宵為說經憂患異日相  
逢各老蒼更欲少留天不許曉風吹艇入垂楊

次朴翁遊蘭亭韻

亞字橋亭面面風六人同坐樹陰中松交歸路如

留客石礙流杯故惱公山色最憐秦望綠野花只

作晉時紅夕陽啼鳥人將散俛仰興懷自昔同

祠堂有杜鵑花兩株

次韻胡仲方因楊伯子見寄

此去廬陵定幾程向來筇杖未經行懸知征棹雲  
邊集大有吟情雪裏生楚渡食萍應甚美舜祠吹

玉直能清二君即日青冥上惟我春山帶雨耕

仲方得萍鄉宰伯子得營道倅

賀張省翁參政

太乙圖書客屢談已知上相出淮南銀臺日月非

虛過金鼎功名得細參從此與人爲雨露應憐有  
客臥雲嵐明朝起爲蒼生賀旋著藤冠紫竹簪

陳君玉以小集見歸用余還誠齋朝天續

集韻作七字夔報賦

筆陣無功汗左輪而今老去不能軍水邊白鳥閒  
於我牕外梅花疑是君欲向江湖行此語可無朋  
友託斯文新篇大是相料理因憶西山楊子雲

寄田郎

楚楚田郎亦大奇少年風味我曾知春城寒食誰  
相伴夜月梨花有所思剪燭屢呼金鑿落倚牕閒

品玉參差含情不礙逢人說鸚鵡能歌自作詞

送王德和提舉淮東

京塵吹帽汗淋衣相見頻年只道歸省裏移文那  
得了家邊持節未爲非煮乾碧海知誰用割盡黃  
雲尚告飢可得不爲根本計秋風還是鴈南飛

寄時父

遲君日日數歸程到得君歸我已行一路好山思  
共看半年有酒不同傾吾儕正坐清貧累各自而  
今白髮生人物眇然須強飯天工應不負才名

送李萬頃

猛相思裏得君來正喜歡時却便回別路恐無青  
柳折到家應有小桃開起居五馬兼堂上問信千  
岩及阿灰張禕姪張曙兒女癡頑夫婦健漂零何  
日共尊壘

次韻千岩雜謠蕭海藻

中散平生七不堪鳳塵時時伴燕談道士有神傳  
火棗故人無字入雲藍雨涼竹葉宜三酌日落荷  
花倚半酣極欲扁舟南蕩去冷鷗輕燕略相諳

寄上鄭郎中

梅根東望九華雲中有風流衣繡人名下一生勞

夢想尊前數語倍情親節旄在道催歸漢花鳥留  
君且作春見說祥雲挾時雨故園松菊亦精神

送左真州還長沙

吳兒牽挽醉尊鱸今日西歸略自如別路冷雲隨  
驛馬望鄉喬木記吾廬湘中花月偏憐酒淮左兒  
童待擁車凡我舊遊君更歷橘州相見訝無書

乍涼寄朴翁

前日松間步屨歸更將荷葉障秋暉如今城裏拋  
團扇應是山中試袂衣水有秋容蓮漸少樹含涼  
氣鳥慵飛炎天既懶趨城市從此尤須戀翠微

呈方叔

聱牙落魄一閒官，職事何曾見一斑。  
不是論松須說劍，若非尋壑即觀山。  
閒看落葉隨風去，冷笑奔雲送雨還。  
更有荆巖楊處士，伴渠癡坐老花間。

夏日奉天台祿

青天揮箠臥藤牀，翠袖攜壺過酒漿。  
蝟腹出波烹芡實，裊蹄和露擘蓮房。  
相呼時入雞豚社，獨坐曾無鴈鷺行。  
便是赤城真隱吏，不將劉阮更相將。

冬夜不寐

宵柝迢迢警睡魔，靜思甘分老林坡。  
忍飢但有嵇

康嬾扣角曾無甯戚歌，不起妄心思世事。  
只將閒意養天和，時人休說長生術。  
學著長生事轉多。

閒詠

虛縻廩祿飲醇醪，不押文書不坐曹。  
檢點園花爲日課，裒尋詩草記年勞。  
仍將書冊供慵臥，時喚杯盤佐老饕。  
感激大恩何以報，惟祈聖壽與天高。

負暄

不是羲和德澤流，寒鄉何處覓溫柔。  
絕憐天上紅綿襖，大勝人間紫綺裘。  
旋欲胡牀隨影轉，更攜書卷與閒謀。  
天和妙處知誰會，欲獻君王却自羞。

白石詩集  
和陸放翁見寄

遙知三徑長荒苔解組東歸亦快哉津岸紛紛羣  
吏去船頭袞袞好山來平時佳客應相過勝日清  
尊想屢開若許詩篇數還往直須追挽古風回

和放翁

午庭風雨撼高槐一洗城頭十丈埃老子坐間尋  
句好故人門外寄詩來勁鋒久服穿楊妙鈍思深  
慙擊鉢催清珮左符君未可安聽吟思發春雷

寄汪尚書

五十年間歎濶踈相忘兩地復江湖書來筆底驚

強健詩去吟邊想步趨好對青山看歌舞莫嫌紅  
粉笑頰鬚鳳毛已有哦松韻尚記金章舊範模  
五言絕句

明妃

全潘德  
久作

明妃未嫁時滿宮妬娥眉一朝辭玉陛人人淚雙  
垂

年年心隨鴈日日穹廬中遙見沙上月忽憶建章  
宮

身同漢使來不同漢使歸雖為胡中婦只著漢家  
衣

古樂府

裁衣贈所歡曲領再三安歡出無人試閨中自著看

甚欲逐郎行畏人笑無媒日日東風起西家桃李開

令我歌一曲曲終郎見留萬一不當意翻作平生羞

與和甫

枯槎啖乾鵲交臂失夫君奈此一尊酒憑高空水雲

東堂聯句

金風生夜深吹我蕭蕭髮起折丹桂枝驚落花上

月

趙雍和仲白石

七言絕句

牛渚

牛渚磯邊渺渺秋笛聲吹月下中流西風不識張京兆畫得蛾眉如許愁

武康丞宅同朴翁詠牽牛

青花綠葉上疎籬別有長條竹尾垂老覺淡妝羞有味滿身秋露立多時

朴公悼牽牛甚奇余亦作

不見青青繞竹生西風籬落抱枯藤道人一任空  
花過愁殺山陰覓句僧

過德清

木末誰家縹緲亭畫堂臨水更虛明經過此處無  
相識塔下秋雲為我生

溪上佳人看客舟舟中行客思悠悠煙波漸遠橋  
東去猶見闌干一點愁

過湘陰寄平岩

渺渺臨風思美人荻花楓葉帶離聲夜深吹笛移

船去三十六灣秋月明

鴈圖

萬里晴沙夕照西此心唯有斷雲知年年數盡秋  
風字想見江南搖落時

除夜自石湖歸苕溪

此詩錄寄誠齋得報云所寄十詩有裁雲

縫霧之妙思敲金戛玉之奇聲

細草穿沙雪半銷吳宮烟冷水迢迢梅花竹裏無  
人見一夜吹香過石橋

美人臺上昔歡娛今日空臺望五湖殘雪未融青  
草死苦無麋鹿過姑蘇

黃帽傳呼睡不成投篙細細激一作擊流水分明舊泊  
江南岸舟尾春風颭客燈

千門列炬散林鴉兒女相思未到家應是不眠非  
守歲小牕春色入燈花

三生定是陸天隨只向吳松作客歸已拚新年舟  
上過倩人和雪洗征衣

沙尾風回一棹寒椒花今夕不登盤百年草草都  
如此自琢春詞剪燭看

笠澤茫茫鴈影微玉峯重疊護雲衣長橋寂寞春  
寒夜只有詩人一舸歸

桑間篝火却宜蠶風土相傳我未諳但得明年少  
行役只裁白紵作春衫

小小知名翰墨場十年心事只淒涼舊時曾作梅  
花賦研墨於今亦自香

環玦隨波冷未銷古苔留雪臥牆腰誰家玉笛吹  
春怨看見鶯黃上柳條

臨安旅次答蘇虞叟

垂楊風雨小樓寒宋玉秋詞不忍看萬里青山無  
處隱可憐投老客長安

姑蘇懷古

夜暗歸雲繞柁牙江涵星影鷺眠沙行人悵望蘇  
臺柳曾與吳王掃落花

次韻德久

籬落青青花倒垂避人黃鳥雨中飛西郊寂寞無  
車馬時有溪童賣菜歸

次石湖書扇韻

橋西一曲水通村岸閣一作隔浮萍綠有痕家住石湖  
人不到藕花多處別開門

竹友為徐南卿

髮已星星帶已寬徐卿猶是客長安家山竹好無

由看漫種庭前一兩竿

世路蒼茫總是愁暮年須得小優游如今漸覺知  
心少賸種青青伴白頭

壽朴翁

與師同月不同年歸墨歸儒各自緣想得山中無  
壽酒但攜茶到菊花前

湖上寓居雜咏

荷葉披披一浦涼青蘆奕奕夜吟商平生最識江  
湖味聽得秋聲憶故鄉  
湖上風恬月澹時臥看雲影入玻璃輕舟忽向牕

前過搖動青蘆一兩枝

秋風低結亂山愁千頃銀波礙不流隄畔畫船隄  
上馬綠楊風裏兩悠悠

處處虛堂望眼寬荷花荷葉過闌干遊人去後無  
簫鼓白水青山生晚寒

輦路垂楊兩行栽苑門秋水欲平階朝朝南望宮

雲起白鳥一雙

一作聲

山下來

微波衝得綠萍開數點青青黏石階綠葑自來還  
自去來時須載白鷗來

布衣何用揖王公歸向蘆根濯軟紅自覺此心無

一事小魚跳出綠萍中

囊空萬字總空言露滴桐枝欲斷絃時事悠悠吾  
亦懶臥看秋水浸山煙

苑牆曲曲柳冥冥人靜山空見一燈荷葉似雲香  
不斷小船搖曳入西陵

處士風流不並時移家相近若依依夜涼一舸孤  
山下林黑草深螢火飛

臥榻看山綠漲天角門長泊釣魚船而今漸欲拋  
塵事未了菟裘一悵然

鈎窗不忍見南山下有三雛骨未寒惆悵古今同

此味二陵風雨晉師一作陵還

柳下軒窗枕水開畫船忽載故人來與君同過西城路却指烟波獨自回  
指點移舟著柳隄美人相顧復相攜上橋更覺秋香重花在西陵小苑西

平甫見招不欲往

老去無心聽管絃病來杯酒不相便人生難得秋前雨乞我虛堂自在眠

樓閣萬重秋雨裏峰巒四合暮潮還鳳城今夕涼如水多少人家試管絃

三高祠

越國伯來頭已白洛京歸後夢猶驚沈思只羨天隨子蓑笠寒江過一生

過桐廬

橫看山色仰看雲十幅風帆不藉人記取合江江畔樹他年此處好垂綸

過垂虹

自作新詞韻最嬌小紅低唱我吹簫曲終過盡松陵路回首煙波十四橋

訪費上人

稻叢茁茁欲齊肩楊柳傲傲不蔽蟬忽憶石頭橋  
下路槿花斜壓釣魚船

登烏石寺觀張魏公劉安成岳武穆留題

劉云侍兒意真奉命題記

諸老凋零極可哀尚留名字壓崔嵬劉郎可是疎  
文墨幾點胭脂汙綠苔

項里

項里項王之里也在山陰西南二十餘里地  
多楊梅苔梅皆妙天下王性之賦項里楊梅  
云只今枝頭萬顆紅猶似咸陽三月火子近

得苔梅一株古怪特甚為作七言

舊國婆娑幾樹梅將軍逐鹿未歸來江東父老空  
相憶枝上年年長綠苔

雪中六解

塞草汀雲護玉鞍連天花落路漫漫如今却憶當  
時健下馬題詩不怕寒

黃鶴磯邊晚渡時柳花風急片帆飛一聲長笛魚  
龍舞白浪如山不肯歸

萬馬行空轉屋簷高寒屢索酒杯添故人家住吳  
山上借得西湖自捲簾

曾泛扁舟訪石湖恍然坐我范寬圖天寒遠挂一行雁三十六峰生玉壺

萬壑千巖一樣寒城中別有玉龍蟠舊人乘興扁

舟處

一作去

今日詩仙

一作成

戴笠看

沈香火裏笙簫合煖玉鞍邊雉兔空辨得煎茶有驕色先生只合作詩窮

### 越中士女春遊

秦山越樹兩依依閒倚闌干看落暉楊柳梢頭春又暗玉簫聲裏夜遊歸

### 送范仲訥往合肥三首

壯志只便鞍馬上客夢長在江淮間誰能辛苦運河裏夜與商人爭往還

我家曾住赤

一作石

欄橋鄰里相過不寂寥君若到時

秋已半西風門巷柳蕭蕭

小簾燈火屢題詩回首青山失後期未老劉郎定重到煩君說與故人知

### 下孤城

人家多在竹籬中楊柳踈踈尚帶風記得下孤城下路白雲依舊兩三峰

### 平甫放三十六鷗於吳松余不及與盟

白石詩集  
橋下松陵綠浪橫來遲不與白鷗盟知君久對青  
山立飛盡梨花好句成

蕭山

歸心已逐晚雲輕又見越中長短亭十里水邊山  
下路桃花無數麥青青

戊午春帖子

晴窗日日擬雕蟲惆悵明時不易逢二十五絃人  
不識淡黃楊柳舞一作倚春風

偶題

阿八宮中酒未醒天風吹髮夜泠泠歸來只怕扶

桑晚赤脚橫騎太一鯨

陳日華侍兒讀書

繹句尋章久未休花房日晏不梳頭誰教郎主能  
多事乞與冥冥千古愁

女郎山

漢陽縣西二十里

不見郢中能賦客可憐負此女郎山水魂寂寞無  
歸處獨宿鴛鴦沙水寒

釣雪亭

闌干風冷雪漫漫惆悵無人把釣竿時有官船橋  
畔過白鷗飛去落前灘

白石詩集  
綠萼梅

黃雲承韉知何處招得冰魂付北枝金谷樓高愁  
欲墮斷腸誰把玉龍吹

次韻武伯

楊柳風微約暮寒野禽容與只波間道人心性如  
天馬可愛青絲十二閑

觀燈口號

世間形象盡成燈烘火旋紗巧思生列肆又多看  
不遍行人一一把燈行

市樓歌吹太喧譁燈若連珠照萬家太守令嚴君

莫舞遊人空帶玉梅花

遊人總戴孟家蟬爭託星球萬眼圓鬧裏傳呼大  
官去後車多少盡嬋娟

花帽籠頭幾歲兒女兒學著內人衣燈前月下無  
歸路不到天明亦不歸

好燈須買不論錢別有琉璃價百千都下貴人多  
預賞買時長在一陽前

珠絡琉璃到地垂鳳頭銜帶玉交枝君王不賞無  
人進天竺堂深夜雨時

紛紛鐵馬小回旋幻出曹公大戰年若使英雄知

□事不教兒女戲燈前  
貴客鈎簾看御街市中珍品一時來簾前花架無  
行路不得金錢不肯回  
修內司人編戲鼓輦宮營裏獨燒燈春風到處皆  
君賜金柳絲絲滿鳳城  
正好嬉遊天作魔翠翬無奈雨沾何御街暗裏無  
燈火處處但聞樓上歌

陪張平甫遊禹廟

鏡裏山林綠到天春風只在禹祠前一聲何處提  
壺鳥猛省紅塵二十年

燈詞

南陌東城盡舞兒畫金刺繡滿羅衣也知愛惜春  
遊夜舞落銀蟾不肯歸  
燈已闌珊月氣寒舞兒往往夜深還只因不盡婆  
娑意更向階心弄影看  
沙河雲合無行處惆悵來遊路已迷却入靜坊燈  
火室門門相似列蛾眉  
遊人歸後天街靜坊陌人家未閉門簾裏垂燈照  
尊俎坐中嬉笑覺春溫

春詞

白石詩集  
六軍文武浩如雲花簇頭冠樣樣新惟有至尊渾  
不戴盡將春色賜羣臣  
萬數簪花滿御街聖人先自景靈回不知後面花  
多少但見紅雲冉冉來

同朴翁過淨林廣福院

四人松下共盤桓筆硯花壺石上安今日興懷同  
此味老仙留字在孱顏

三高祠

不貪名爵伐功勞勇退深虞後患遭甫里閒居畊  
釣樂范張高處陸猶高

於越亭

松尾颼颼石浪寒胡啼蕃曲轉聲酸人間無此春  
風手應是江妃夜夜彈

寄俞子

此郎都無子弟氣夜對黃妳籠青燈君今落脚墮  
鴛外欲往從之歎未能

郎罷才名今白髮佐州亦復坐窮邊甚欲出予相  
料理東南風高難寄牋

六言

金神夜獵圖

夜半金神羽獵奔走山川百靈雲氣旂旗來下颯  
然已入青冥  
後宮嬋娟玉女自輕八尺飛龍兩兩鳴鞭爭導綠  
雲斜墜春風

次韻鴛鴦梅

晴日小溪沙暖春夢憐渠頸交只怕笛聲驚散費  
人月咏風嘲

漠漠江南煙雨于飛似報初春折過女郎山下料  
應愁殺佳人

馬上值牧兒

馬背何如牛背短衣落日空山只應身歸盤谷未  
須名滿人間

諸賢酬贈詩附見

楊萬里廷秀送姜堯章謁石湖先生

釣璜英氣橫白蜺欬吐珠玉皆新詩江山愁訴  
鷺為泣鬼神露索天洩機彭蠡波心弄明月詩  
星入腸肺肝裂吐作春風百種花吹散瀕湖數  
峰雪青鞵布襪軟紅塵千詩只博一字貧吾友  
彝陵蕭太守逢人說項不離口袖詩來來謁老  
夫慚無高價索璠璣翻然欲買松江艇逕去蘇  
州參石湖

進退格寄張功甫姜堯章

尤蕭范陸四詩翁此後誰當第一功新拜南湖  
為上將更牽白石作先鋒可憐公等俱癡絕不  
見詞人到老窮謝遣管城儂已曉酒泉端欲乞  
移封

范成大至能次韻堯章雪中見贈

玉龍陣長空臯比忽先犯鱗甲塞天飛戰逐三

百萬當時訪戴舟却訪一寒范新詩如美人蓬  
華愧三粲

周文璞晉先題堯章新成草堂  
早將心事付漁樵若被幽人苦見招多種竹將  
挑筍喫旋栽松待斫柴燒壁間古畫身都碎架  
上枯琴尾半焦猶有住山窮活計仙經盈卷一  
郵瓢

姜堯章金塗佛塔歌

白石招我入書齋使我速禮金塗塔我疑此塔  
非世有白石云是錢王禁中物上作如來捨身  
相飢鷹餓虎紛相向拈起靈山受記時龍天帝  
釋應惆悵形模遠自流沙至鑄出今回更精緻  
錢王納土歸京師流落多在西湖寺錢王本是  
英雄人白蓮花現國主身蛇獅虎落狗脚朕何  
如紅袍玉帶稱功臣天封圻開即退聽兩浙不  
聞笳鼓競歸來佛子作護持大師尚父尚書令  
一枚傳到白石生生今但有能詩名同袍秦□  
銛師兄哦詩禮塔作佛事同喫地壚山芋羹何  
曾薰陸倚牀供但見相輪銅綠明哦詩禮塔猶  
未畢蘆葉低飛山雨濕

弔堯章

相逢蕭寺已壘然自詠離騷講太玄極目舊遊  
惟白石傷心孤塚只蒼烟兒從外舍收殘稿客  
向空山泣斷猿帝所修文與張樂魂兮應是到  
均天

王炎晦叔和堯章九日送菊二首

對花懶舉玉東西孤負金錢滿綠枝短髻不堪  
重落帽枯腸何可強搜詩  
花品若將人品較此花風味似吾儒秋英餐罷  
含清思曾有離騷續筆無

題堯章舊遊詩卷

出郭栽花涉小園歸調琴譜輯詩編少年豪健  
今拏斂休羨騎鯨李謫仙

臘中得雪快晴成古風呈堯章銛老

蒼頭熟睡喚不應光射紙牕疑月明更籌可數  
夜方半棧上一雞先誤鳴曉起飛花堆戶外幻  
出人間無色界九街車馬不知寒蹴蹋銀杯翻  
縞帶杲杲日升東海東須臾光彩蒸霞紅不憂  
桂玉頓增價人在冲融和氣中貝闕珠宮五雲  
際遙知天上龍顏喜麥畦白白覆青青農事年

來定豐美

葛天民無懷清明日訪白石不值

花薺懸燈柳拂簷老懷那得似錫甜畫船已載  
先生去燕子無人自入簾

重訪白石

長安惟白石與我最相關每到難逢面翻思懶  
下山欲歸愁路永小住待君還盡日看幽桂無  
人似我閒

六月一日與堯章泛湖

六月西湖帶雨山小舟終日傍鷗閒風烟如許  
關情甚實主相推下語難幾點送君歸大雅一  
涼今夜滿長安江湖遠思知多少歸去風前各  
倚闌

白石詩集

白石詞集

宋番陽姜夔堯章著

一萼紅 人日登定王臺

古城陰有官梅幾許紅萼未宜簪池面冰膠牆腰  
雪老雪意還又沉沉翠藤共閑穿徑竹漸笑語驚  
起臥沙禽野老林泉故王臺榭呼喚登臨 南去  
北來何事蕩湘雲楚水目極傷心朱戶黏雞金盤  
簇燕空歎時序侵尋記曾共西樓雅集想垂柳還  
裊萬絲金待得歸鞍到時只怕春深

揚州慢

仲呂宮 淳熙丙申至日余過維揚夜雪初霽薺麥彌望入其城則

白石詩集  
四顧蕭條寒水自碧暮色漸起戍  
角悲吟予懷愴然感慨今昔因自  
度此曲千巖老人以為有黍離之  
悲也此後凡載宮商者並是自製  
曲

淮左名都竹西佳處解鞍少駐初程過春風十里  
盡薺麥青青自胡馬窺江去後廢池喬木猶厭言  
兵漸黃昏清角吹寒都在空城 杜郎俊賞算如  
今重到須驚縱豈寇詞工青樓夢好難賦深情二  
十四橋仍在波心蕩冷月無聲念橋邊紅藥年年  
知為誰生

驀山溪

題錢氏溪月

與鷗為客綠野留吟屐兩行柳垂陰是當年仙翁  
手植一亭寂寞烟外帶愁橫荷冉冉展涼雲橫臥  
虹千尺 才因老盡秀句君休覓萬綠正迷人更  
愁入斷腸夜笛百年心事惟有玉欄知吟未了放  
船回月下空相憶

暗香

舊時月色算幾番照我梅邊吹笛喚起玉人不管  
清寒與攀摘何遜而今漸老都忘却春風詞筆但  
怪得竹外疎花暗香冷入瑤席 江國正寂寂歎  
寄與路遙夜雪初積翠樽易竭紅萼無言耿相憶

長記曾攜手處千樹壓西湖寒碧又片片吹盡也  
幾時見得

疎影 仙呂宮

苔枝綴玉有翠禽小小枝上同宿客裏相逢籬角  
黃昏無言自倚修竹昭君不慣胡沙遠但暗憶江  
南江北想珮環月下歸來化作此花幽獨 猶記  
深宮舊事那人正睡裏飛近蛾綠莫似春風不管  
盈盈早與安排金屋還教一片隨波去又却怨玉  
龍哀曲等恁時重覓幽香已入小牕橫幅

長亭怨慢

中呂宮 桓大司馬云昔年種柳依依漢南今看搖落悽愴江

潭樹猶如此人何以堪此語予深愛之

漸吹盡枝頭香絮是處人家綠深門戶遠浦縈迴  
暮帆零亂向何許閱人多矣誰得似長亭樹樹若  
有情時不會得青青如此 日暮望高城不見只  
見亂山無數韋郎去也怎忘得玉環分付第一是  
早早歸來怕紅萼無人為主算只有并刀難剪離  
愁千縷

小重山令 湘梅

人繞湘臯月墮時斜橫花樹小浸愁漪一春幽事  
有誰知東風冷香遠茜裙歸 鷗去昔遊非遙憐

花可可夢依依九疑雲杳斷魂啼相思血都沁綠  
筠枝

鷓鴣天 元夕不出

憶昨天街預賞時柳慳梅小未教知而今正是歡  
遊夕却怕春寒自掩扉 簾寂寂月低低舊情惟  
有絳都詞芙蓉影暗三更後臥聽隣娃笑語歸

又 茗溪記所見

京洛風流絕代人因何風絮落溪津籠鞋淺出鴉  
頭襪知是凌波縹緲身 紅半笑綠長嘖與誰共  
度可憐春鴛鴦獨宿何曾慣化作西樓一縷雲

又

輦路珠簾兩行垂千枝銀燭舞傲傲東風歷歷紅  
樓下誰識三生杜牧之 歡正好夜何其明朝春  
過小桃枝鼓聲漸遠遊人散惆悵歸來有月知

憶王孫

冷紅葉葉下塘秋長與行雲共一舟零落江南不  
自由兩綢繆料得吟鸞夜夜愁

念奴嬌 吳興荷花

開紅一舸記來時長與鴛鴦為侶三十六陂人未  
到水佩風裳無數翠葉吹涼玉容銷酒更灑菰蒲

雨嫣然搖動冷香飛上詩句  
日暮青蓋亭亭情  
人不見爭忍凌波去只恐舞衣寒易落愁入西風  
南浦高柳垂陰老魚吹浪留我花間住田田多少  
幾回沙際歸路

惜紅衣

吳興荷花無射宮

枕簟邀涼琴書換日睡餘無力細灑冰泉并刀破  
甘碧牆頭喚酒誰問訊城南詩客岑寂高柳晚蟬  
說西風消息虹梁水陌魚浪吹香紅衣半狼籍  
維舟試望故國渺天北可惜渚邊沙外不共美人  
遊歷問甚時同賦三十六陂秋色

秋宵吟

越調

古簾空墜月皎坐久西牕人悄蛩吟苦漸漏永丁  
丁箭壺催曉引涼颼動翠葆露脚斜飛雲表因嗟  
念似去國情懷暮帆烟草帶眼消磨爲近日愁  
多頓老衛娘何在宋玉歸來兩地暗縈繞搖落江  
楓早嫩約無憑幽夢又杳但盈盈淚灑單衾今夕  
何夕恨未了

少年遊

戲張平甫

雙螺未合雙蛾先斂家在碧雲西別母情懷隨郎  
滋味桃葉渡江時扁舟載了匆匆去今夜泊前

溪楊柳津頭梨花牆外心事兩人知

鬲溪梅

仙宮調

無錫歸寓意

好花不與帶香人浪粼粼又恐春風歸去綠成陰  
玉鈿何處尋 木蘭雙槳夢中雲小橫陳謾向孤  
山山下覓盈盈翠禽啼一春

淒涼犯

仙呂調犯商調

合肥秋夕

綠楊巷陌秋風起邊城一片離索馬嘶漸遠人歸  
甚處戍樓吹角情懷正惡更衰草寒烟淡薄似當  
時將軍部曲迤邐度沙漠 追念西湖上小艇攜  
歌晚花行樂舊遊在否想如今翠凋紅落謾寫羊

裙等新鴈來時繫着怕匆匆不肯寄與悞後約

翠樓吟

雙調

武昌安遠樓成

月冷龍沙塵清虎落今年漢酺初賜新翻胡部曲  
聽毡幕元戎歌吹層樓高峙看檻曲縈紅簷牙飛  
翠人姝麗粉香吹下夜寒風細 此地宜有詞仙  
擁素雲黃鶴與君遊戲玉梯凝望久歎芳草萋萋  
千里天涯情味仗酒被清愁花消英氣西山外晚  
來還捲一簾秋霽

清波引

詠梅

冷雲迷浦倩誰喚玉妃起舞歲華如許野梅弄着

嬾屐齒印蒼蘚漸為尋花來去自從秋鴈南來望  
江國渺何處 □□□□新詩謾與好風景長是  
暗度故人知否抱幽恨難語何時共漁艇莫負滄  
浪烟雨况有清夜啼猿怨人良苦

探春慢

衰草愁烟亂鴉送日風沙回旋平野拂雪金鞭欺  
寒茸帽還記章臺走馬誰念漂零久謾贏得幽懷  
難寫故人清沔相逢小牕閒共情話 長恨離多  
會少重訪問竹西珠淚盈把鴈磧沙平漁汀人散  
老去不堪遊冶無奈茗溪月又照我扁舟東下甚

日歸來梅花零亂春夜

淡黃柳

正平調近

客合肥

空城曉角吹入垂楊陌馬上單衣寒惻惻看盡鵝  
黃嫩綠都是江南舊相識 正岑寂明朝又寒食  
強攜酒小橋宅怕梨花落盡成秋色燕子飛來問  
春何在惟有池塘自碧

側犯

詠芍藥

恨春易去甚春却在揚州住微雨正繭栗稍頭弄  
詩句紅橋二十四總是行雲處無語漸半脫宮衣  
笑相顧 金壺細葉千朶圍歌舞誰念我鬢成絲

來此共尊俎後日西園綠陰無數寂寞劉郎自修  
花譜

眉嫵

亦名百宜嬌

戲張仲遠

看垂楊連苑杜若吹沙愁損未歸眼信馬青樓去  
重簾下娉婷人妙飛燕翠尊共款聽艷歌郎意先  
感便攜手月地雲階裏愛良夜微煖無限風流  
疎散有暗藏弓履偷寄香翰明日聞津鼓湘江上  
催人還解春纜亂紅萬點悵斷魂烟水遙遠又爭  
似相攜乘一舸鎮長見

石湖仙

越調

壽石湖居士

松江烟浦是千古三高遊衍佳處須信石湖仙侶  
鷗夷翩然引去浮雲安在我自愛綠香紅舞容與  
看世間幾度今古蘆溝舊曾駐馬爲黃花閑吟  
秀句見說胡兒也學綸巾欹羽玉友金蕉玉人金  
縷緩移箏柱聞好語明年定在槐府

玉梅令

高平調  
戲之

石湖畏寒不出故作此

疎疎雪片散入溪南苑春寒鎖舊家亭館有玉梅  
幾樹背立怨東風高花未吐暗香已遠公來領  
略梅花能勸花長好願公更健便探春爲酒剪雪  
作新詩拚一日繞花千轉

踏莎行 金陵感夢

燕燕輕盈鶯鶯嬌軟分明又向華胥見夜長爭得  
薄情知春初早被相思染 別後書詞別時鍼線  
離魂暗逐郎行遠淮南皓月冷千山冥冥歸去無  
人管

八歸 夾鍾商 湘中送胡德華

芳蓮墜粉疎桐吹綠庭院暗雨乍歇無端抱影銷  
魂處還見篠牆螢暗蘚階蛩切送客重尋西去路  
問水面琵琶誰撥最可惜一片江山總付與啼鴉  
長恨相從未款而今何事又對西風離別渚寒

烟淡棹移人遠縹緲行舟如葉想文君望久倚竹  
愁生步羅襪歸來翠尊雙飲下了珠簾玲瓏閑看  
月

驀山溪 題梅

洗妝真態不在鉛華夕竹外一枝斜想佳人天寒  
日暮黃花小院無處着清香風細細雪垂垂何況  
江頭路 月邊疎影夢到銷魂處結子欲黃時又  
須作廉纖細雨孤芳一世供斷有情愁消瘦損東  
陽也試問花知否

又 詠情

鴛鴦翡翠小小思珍偶着黛斂秋波儘湖南山明  
水秀娉娉嫋嫋恰近十三餘春未透花枝瘦正是  
愁時候尋芳載酒肯落誰人後只恐遠歸來綠  
成陰青梅如豆心期得處每不自由人長亭柳君  
知否千里猶回首

訴衷情 端午宿合路

石榴一樹浸溪紅零落小橋東五日淒涼心事山  
雨打船篷諳世味楚人弓莫忡忡白頭行客不  
採蘋花孤負薰風

點絳脣 丁未冬過吳江作

燕鴈無心太湖西畔隨雲去數峰清苦商略黃昏  
雨第四橋邊擬共天隨住今何許凭闌懷古殘  
柳參差舞

又 感舊

金谷人歸綠楊低掃吹笙道數聲幽鳥也學相思  
調月落潮生掇送劉郎老淮南好甚時重到陌  
上生春草

又 和吳見山韻

金井空陰枕函歷盡秋聲鬧夢長難曉月樹愁鴉  
悄梅壓檐梢寒蝶尋香到牕粘了翠池春小波

冷鴛鴦覺

金谷人又壽

祝壽筵開畫堂深映花如繡瑞烟噴獸簾幙香風  
透一點台星化作人間秀韶音奏兩行紅袖齊  
勸長生酒

又草

金谷年年亂生春色誰為主餘花落處滿地和烟  
雨又是離愁一闋長亭暮王孫去萋萋無數南  
北東西路

浣溪沙

丙申臘俞商鄉銛朴翁同寓新安溪莊舍賦得蠟梅二首

花裏春風未覺時美人呵蕊綴橫枝隔簾飛過蜜  
蜂兒書寄嶺頭封不得影浮盃面誤人吹寂寥  
惟有夜寒知

又

剪剪寒花小更垂阿瓊愁裏弄妝遲東風燒燭夜  
深歸落蕊半粘釵上燕露黃斜映岸邊犀老夫  
無味已多時

四犯玲瓏

黃鍾商

越中歲暮聞簫感懷

疊鼓夜寒垂燈春淺忽忽時事如許倦遊歡意少  
俯仰悲今古江淹又吟恨賦記當時送君南浦萬

里乾坤百年身世惟有此情苦  
揚州柳垂官路  
有輕盈喚馬端正窺戶酒醒月明下夢逐潮聲去  
文章信美知何用謾贏得天涯羈旅教說與春來  
要尋花伴侶

解連環 詠情

玉鞍重倚却沉吟未上又縈離思爲大喬能撥春  
風小喬妙移箏鴈啼秋水柳怯雲鬆更何必十分  
梳洗道郎攜羽扇那日隔簾半面曾記 西窓夜  
涼雨霽歎幽歡未足何事輕棄問後約空指薔薇  
算如此溪山甚時重至驛燈昏又見在曲屏近底

念惟有夜來皓月照伊自睡

水龍吟

俗名越調無射商 黃度長夜泛鑑湖有懷歸之曲課子和之

夜深客子移舟處兩兩沙禽驚起紅衣入槳青燈  
搖浪微涼意思把酒臨風不思歸去有如此水况  
茂陵遊倦長干望久芳心事簫聲裏 屈指歸期  
尚未鵲南飛有人應喜畫闌桂子留香小待提攜  
影底我已情多十年幽夢約略如此甚謝郎也恨  
漂零解道月明千里

齊天樂

俗名正宮 黃鍾宮促織

庾郎先 去聲 自吟秋賦淒淒更聞私語露濕金鋪苔

侵石井都是曾聽伊處哀音似訴正思婦無眠起  
尋機杼曲曲屏山夜涼獨自甚情緒 西牕又吹  
暗雨爲誰頻斷續相和砧杵候館吟秋離宮弔月  
別有傷心無數幽詩謾與笑籬落呼燈世間兒女  
寫入琴絲一聲聲更苦

法曲獻仙音

俗名大石黃鍾商 秋感絕  
妙詞作張彥功官舍

虛閣籠寒小簾通月暮色偏憐高處樹隔離宮水  
平馳道湖山盡入尊俎奈楚客淹留久砧聲帶愁  
去 屢回顧過秋風未成歸計誰念我重見冷楓  
紅舞喚起淡妝人問逋仙今在何許象筆鸞牋甚

而今不道秀句怕平生幽恨化作沙邊烟雨

越女鏡心

別席毛荳

風竹吹香水楓鳴綠睡覺涼生金縷鏡底同心枕  
前雙玉相看轉傷幽素傍綺閣輕陰度飛來鑑湖  
雨 近重午燎銀篝暗薰溽暑羅扇小空寫數行  
怨苦纖手結芳蘭且休歌九辨懷楚故國情多對  
溪山都是離緒但一川烟葦恨滿西陵歸路

又 春晚

花匣么絃象奩雙陸舊日留歡情意夢別銀屏恨  
裁蘭燭香篝夜閑鴛被料燕子重來地桐陰鎖牕

綺 倦梳洗暈芳鈿自羞鸞鏡羅袖冷烟柳畫簾  
半倚淺雨壓茶蘼指東風芳事餘幾院落黃昏怕  
春鶯驚笑憔悴倩柔紅約定喚取玉簫同醉

念奴嬌 謝友人惠竹榻

楚山修竹自娟娟不受人間袞暑我醉欲眠伊伴  
我一枕涼生如許象齒為材花藤作面終是無真  
趣梅風吹溽此君直恁清苦 須信下榻慙勤脩  
然成夢夢與秋相遇翠袖佳人來共看漠漠風烟  
千畝蕉葉牕紗荷花池館別有留人處此時歸去  
為君聽盡秋雨

鬲指

又名湘月 甲午七月既望與楊聲伯趙景曾望蕭和甫裕甫時甫恭甫渡湘大舟

五湖舊約問經年底事長負清景暝入西山漸喚  
我一葉夷猶乘興倦網都收歸禽時度月上汀洲  
冷中流容與畫橈不點清鏡 誰解喚起湘靈烟  
鬟霧鬢理哀絃鴻陳玉塵談玄歎坐客多少風流  
名勝暗柳蕭蕭飛星冉冉夜久知秋信鱸魚應好  
舊家舊事誰省

又

海天向晚漸霞收餘綺波澄微綠木落山高真箇

是一雨秋容新浴喚起姮娥撩雲撥霧駕此一輪  
玉桂華疎淡廣寒誰伴幽獨 不見弄玉吹簫尊  
前空對此清光堪掬霧鬢風鬟何處問雲雨巫山  
六六珠斗闌干銀河清淺影轉西樓曲此情誰會  
倚風三噴橫竹

又

素娥睡起駕冰輪碾破一天秋綠醉倚江樓風露  
下凜凜寒生肌粟橫管孤吹龍吟風勁雪浪翻銀  
屋壯遊回首會稽何限修竹 今夜對月依然尊  
中須快瀉山頭鳴瀑吸此清光傾肺腑洗我明珠

千斛只恐嬋娟明年依舊衰鬢先如鵲舉杯相勸  
為余且掛團玉

摸魚兒

辛亥秋期予寓合肥小雨初霽偃  
臥牕下心事悠然起與趙君猷露  
坐月飲戲吟此曲蓋欲一洗鈿盒  
金釵之塵它日野處見之甚為予  
擊節也

向秋來漸疎班扇雨聲時過金井堂虛已放新涼  
入湘竹最宜欹枕閒記省又還是斜河舊約今再  
整天風夜冷自織錦人歸乘楂客去此意有誰領  
空贏得今古三星炯炯銀波相望千頃柳州老  
矣猶兒戲瓜果為伊三請雲路迴謾說道年年野

鵲曾並影無人與問但濁酒相呼疎簾自捲微月  
照清影

催雪

賦題

風急還收雪凍未解海闊無人剪水算六出工夫  
怎教容易剛被郢歌楚舞鎮獨向尊前弄輕細笑  
謝庭吟詠梁園宴賞未成歡計 天意是則是怎  
下得控持柳梢梅蕊又爭奈看看漸回春意好趁  
東君未覺先把園林都裝綴看是處玉樹瓊枝勝  
却萬紅千紫

琵琶仙

黃鍾商 吳郡賦云戶藏烟浦家  
具畫船惟吳興爲然春遊之盛西

湖未能過也已酉歲余與蕭  
時甫載酒南遊因遇成歌

雙槳來時有人似舊曲桃根桃葉歌扇輕約飛花  
蛾眉正愁絕春漸遠汀洲自綠更添了幾聲啼鴉  
十里揚州三生杜牧前事休說 又還是宮燭分  
烟奈愁裏忽忽換時節都把一襟芳思與空階榆  
莢千萬縷藏鴉細柳爲玉尊起舞回雪想見西出  
陽關故人初別

月上海棠

夾鍾商

賦題

紅妝艷色照浣花溪影絕代姝麗弄輕風搖蕩滿  
林羅綺自然富貴天姿都不比等閒桃李簾櫳靜

悄月上正貪春睡。長記初開日。逞妖麗。如與人面爭媚。過韶光一瞬，便成流水。對此日，歎浮華惜芳菲。易成憔悴。留無計。惟有花邊盡醉。

喜遷鶯

大簇宮

中筦高功甫新第落成

玉珂朱組又占了道人林下真趣。牕戶新成青紅猶潤。雙燕為君胥宇。秦淮貴人第宅。問誰記六朝歌舞。總付與在柳橋花館。玲瓏深處。居士閑記取高臥未成。且種松千樹。覓句堂深。寫經牕靜。他日任聽風雨。列仙更教誰做。雙成儔侶。世間住且休將雞犬雲中飛去。

霓裳中序第一

秋感

亭臯正望極。亂落紅蓮歸未得多。病却無氣力。况紈扇漸疎。羅衣初索。流光過隙。歎杏梁雙燕如客。人何在一簾淡月。彷彿照顏色。幽寂亂蛩吟壁。動庾信清愁。似織。沉思年少浪迹。笛裏關山柳下坊陌。墜紅無信息。謾暗水涓涓。溜碧漂零。久而今何意。醉臥酒罍側。

滿江紅

滿江紅舊詞用仄韻多不協律如無心撲歌者將心字融入去聲方

諧音律子欲以平韻為之久不能成因汎巢湖祝曰得一夕風當以平韻滿江紅為神姥壽言訖風與帆俱駛頃刻而成末句聞珮環則

按律

仙姥來時正一望于頃翠瀾旌旗與亂雲俱下依

約前山命駕羣龍金作輓相從諸娣玉為冠廟中列坐

如夫人者十五人向夜深風定悄無人聞珮環 神奇處

君試看真淮右阻江南遣六丁雷電別守東關應

笑英雄無好手一篙春水走曹瞞又怎知人在小

紅樓簾影間

鷓鴣天

元日

柏綠椒紅事事新隔簾燈影賀年人三茅鍾動西

牕曉詩鬢無端又一春 慵對客緩開門梅花閑

伴老來身嬌兒學作人間字鬱壘神荼寫未真

浣溪紗

春懷

釵燕籠雲晚不忺擬將裙帶繫郎船別離滋味又

今年 楊柳夜寒猶自舞鴛鴦風急不成眠些兒

閒事莫縈牽

慶春宮

雙槩蕩波一蓑松雨莫愁漸滿空闊呼我盟鷗翩

翩欲下背人還過木末

下闕

南宋詞人浙東西特盛若岳肅之張功甫盧

申之孫季蕃史邦卿吳君特高賓王張叔夏

尹惟曉王聖與周公謹仇仁近及家西麓先

生辯說解先後輩出而審音之精要以白石

為詣極石帚詞凡五卷草窗花菴所錄雖多  
少不同均祇十之二三汲古閣本第增五湖  
舊約燕鴈無心二調餘佚不傳詠草點絳唇  
復見于逋翁集中援據無徵亦難臆定也先  
生事事精習率妙絕無品雖終身草萊而風  
流氣韻足以標映後世當乾淳間俗學充斥  
獻文湮替乃能雅尚如此洵稱豪傑之士矣  
蕭東夫愛其詞妻以兄子曾以上樂章得免  
解訖不第其出處本末草窗云具備于張輯  
所作小傳中他日當更訪得之類諸集首張  
即連江太守思順名履信之子陔華先生服  
竒道古雅喜是編爰為開雕冀垂永久蓋其  
表章之功匪細也丁未清和錢唐陳撰玉几  
書

白石詞集

